

Date – 06/03/2026

Time - 18:30 -18:40Hrs

**AKASHVANI AIZAWL
REGIONAL NEWS BULLETIN**

HEADLINES (EVENING)

1. Vice President Pu C.P. Radhakrishnan chuan vawiin chawhnu khan Mizoram a lo thleng.
2. Higher & Technical Education minister Dr Vanlalhlanaan college hrang hranga UGC-in a phut anga tling lo zirtirtute chu tun thla bak rawih chhonzawm an nih tawh dawn lo a ti.
3. Agriculture & Farmers Welfare Minister Pu P.C Vanlalruata'n Mizoram district pariata chin tur Tung chi Kg 4500 a vai liam.
4. Union Public Service Commission (UPSC) Civil Service Examination 2025 Anuj Agnihotri chu pakhatna a ni a.Hmarchhak atangin mi 10 an tling.

<><><>

VICE PREZ ARRIVES

Mizoram University (MZU) Convocation vawi 20-na naktuka neih tur hmanpui turin Vice President Pu C.P. Radhakrishnan chuan vawiin chawhnu khan Mizoram a lo thleng. Tun hi Vice President a nih hnua Mizoram a lo tlawh hmasak ber a ni.

Vice President hi Lengpui Airport-ah Larsap General (Retd) Vijay Kumar Singh, School Education Minister Dr. Vanlalhlana leh official dangte'n an lo hmuak a. Lok Bhavan-a lo thlenin Larsap bakah Chief Minister Pu Lalduhoma, Home Minister Pu K. Sapdanga, AH& Vety. Minister Pu C. Lalsawivunga leh official dangte'n an lo dawngsawng a ni.

Zanin hian Mizoram Sawrkar chuan Vice President pual hian Lok Bhavan-ah Cultural Programme leh zanriah a buatsaih dawn a. Naktuk hian Mizoram University Convocation vawi 20-na Khuallian niin a hmanpui ang a. Hemi hnu hian Tripura University Convocation vawi 14-na hmanpui turin Mizoram a chhuahsan ang.

<><><>

VP

Vice President C P Radhakrishnan chuan Nagaland thalaite chu ram rawngbawlina leh ram hmasawnaah a tam thei ang bera tel ve turin a sawm. Vawiina Nagaland University Convocation vawi 8-na Lumami-a neih a hmanpuinaah he thu hi sawiin Pu Radhakrishnan chaun Viksit Bharat tihlawhtling turin Viksit Nagaland chu a pawimawh hle dawn a ni a ti a. Ram inpumkhatna chu India chakna ber pakhat anih thu a sawi a.

Prime Minister Narendra Modia kaihhruaina hnuai hmarhchak chuan hmasawna tam tak a neih tu leh remna siam kawngah pawh an hlawhtling hle tih a sawi a. Frontier Nagaland Territorial Authority inremna chungchang sawiin remna leh thawhona tha neih chu state pum hmasawna tur a nih thu a sawi a ni.

<><><>

EDN MINISTER

Higher & Technical Education minister Dr Vanlalhlana chuan college hrang hranga UGC-in a phut anga tling lo zirtirtute chu tun thla bak rawih chhonzawm an nih tawh dawn loh thu vawiin khan House-ah a sawi. RUSA hnuai zirtirtu lakte ngheh theihna tur an ngaihtuah thu a sawi bawk.

Vawiina Assembly Session zawhna chhangin Dr Vanlalhlana chuan unqualified teacher-te ban tir mai loa an qualify theih nan chance pek an ni em tih zawhna chungchangah Dr Vanlalhlana chuan, University Grand Commission (UGC)-in National Eligibility Test (NET) a phut ang nei lote chu chhawr chhonzawm an nih tawh dawn lo a, hreh tak chungin an mahni rawih chhonzawmna tur hi March thla atang chuan a tawp ta a ni, a ti.

Dr Vanlalhlana chuan heng unqualified teacher-te hi dem ngawt theih an nih loh thu a sawi a, hnaa lak an nih dawna advertisement-ah NET phut tel a nih loh thu leh a hnuah sorkarin NET nei turin a tih leh thu a sawi a ni.
(BYTE - Dr Vanlalhlana, HTE Minister)

MPSC-in kum 2019-a RUSA hnuai zirtirtu a lakte chu kum 2 an thawh tlin tawh chuan CSS hnuai mi an nih tawh loh thu leh kum 2 hnuah chuan an hlawh hi state sorkarin a pek vek tawh thu Dr Vanlalhlana chuan a sawi a; sorkarin ‘kum 2 hnuah a liability an tum ang’ tiin a lo intiam tawh a, ZPM sorkar chuan an nghehna tur ngaihtuahin, Council of Minister in a ngaihtuah tawh a, thil nghah hlek ngai, ngaihven ngai thil ala awm a, ngaihven a nih zawhah chuan an chungchang hi chu a rawn chhuak thuai ang a, an ngheh theihna tur ngaihtuah a ni, a ti.

<><><>

MUHCS

Mizoram Universal Healthcare Scheme (MUHCS) zawm duha sorkar dawrtu Mizoram chhunga private damdawi-in 13 leh sorkar chuan damlo enkawlina leh a kaihhnawih man chungchangah inremna an la nei thei lo.

Mizoram State Healthcare Society (MSHCS) hotute chuan Akashvani News Aizawl zawhna chhangin, nikum kumtawp lama MUHCS zawm duhu Mizoram chhunga private damdawi-in 13-te indawrna an la neih mek thu an sawi a, private

damdawi-in ten sorkara an rate duh ang an thehluh chu sorkarin rate a siam dan (package system) nen siamrem theih a nih loh thu an sawi.

Kan corr report lo ngaithla ang.

MUHCS hotute chuan private damdawi-inte hian an rate neihsa atanga zaa 10-a hniamin MUHCS an kalpui theih thu an thehlut tih an sawi a; hei hi sorkar package system nen a kalphung a inan loh avangin siamtha leh turin an ngen a, rate an duh dan an siamthatna hi private damdawi-inte hian sorkarah an la thehluh rih loh thu an sawi a ni.

Mizoram sorkar chuan tunthla ni 3 khan MUHCS kalpuitu damdawi-in hrang hrang hnenah damlo enkawlna senso atan cheng vbc 8 point 19 an pe chhuak a, heti hian nikum April ni 1 atanga tun thla ni 3 thleng khan sorkar chuan MUHCS kalpuitu damdawi-inte hnenah damlo nuai 1, sang 2 & 188 enkawlna senso atan cheng vbc 156 point 35 an pe chhuak tawh a ni..

<><><>

AGRI MINISTER

Agriculture & Farmers Welfare Minister Pu P.C Vanlalruata'n Mizoram district pariata chin tur Tung chi Kg 4500 a vai liam.

Tung chi vai liamna hun hi Directorate of Agriculture & Farmers Welfare Office, Aizawl-ah hman niin Agriculture Minister chuan loneitute din chhuah theihna tur chu a thil vei ber a nih thu a sawi a, Tung chin chu Mizote rilru sukthlek nena inmil, Mizoram leilung mil bawk si a nih avangin loneitute tan thil tih chi tak a nih tur thu a sawi.

Tunah India ramah Tung hriak (Tung oil) mamawhna a san zel thu leh a tam zawk chu ram dang atanga lak luh vek an nih avangin Mizorama kut hnathawktute tan Tung chin chu tharthawh leh tlak nia a hriat thu sawiin, kum 2025 atang khan Agriculture department kaltlangin Saitual, Khawzawl leh Serchhip district-ahte awmze nei zawka chin tan leh a nih thu a sawi a. Kum 2026 ah phei chuan zau zawkin district 8-a khaw 105-ahte chin a nih tur thu a sawiin Agriculture department-a thawktute chu Farmer-te tan thahnem ngaia, uar lehzuala zirtirname kalpui thin turin a chah bawk a ni.

Tung hriak hi bungrua (furniture) tih tletna atan te, varnish, paints leh leather tih tletna atan te leh thil dang hrang hrangah an hmang nasa hle a; chin a nih atanga kum 3 bawr velah an rah tan thei a, kum 30 bawr vel thleng an rah thei a ni. A kung karlakah hian thlai dang Vaimim leh Behliangte chin theih bawkin heng Vaimim leh Behliangte hi Central sawrkar ruahman angin NAFED/NCC ten Minimum Support Price (MSP) in an lei thei bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



ANIMAL INSURANCE

Animal Insurance kalpuina atan Mizoram sorkar chuan cheng nuai 132 point 98 a dawng tawh a; ASF avanga kum 2024-25 chhunga vawk suatte hnena zangnadawmna pek tur cheng nuai 636 pek leh tura ruahman mek a ni.

Assembly session neih mekah vawiin khan AH&Vety minister Pu Lalsawivunga chuan zawhna chhangin, bawng, sial, vawk, kel leh beram vulhtu ten an ran vulhte an thih palha pawisa an hmuh theihna tura duah Animal Insurance kalpui nan Mizoram sorkar chuan National Livelihood Mission atangin pawisa first instalment leh second instalment cheng nuai 66 poin 49 ve ve a hmuh tawh thu a sawi a; 3rd leh 4th instalment pawh hmuh an beisei mek thu a sawi.

Pu C Lalsawivunga chuan ASF vanga kum 2024-25 chhunga vawk suat neitute hnenah central sorkar leh Mizoram sorkarin an intumsem atangin cheng nuai 1,559 vel an pek tawh thu leh kar hmasa Zirtawpni khan central atangin zangnadawmna tur cheng nuai 318 an dawn leh thu a sawi a, Mizoram sorkarin a tum ve tur cheng nuai 318 nen pek leh thuai tura ruahman a nih thu sawiin, kumin 2025-26 chhunga vawk suat neitute hnena zangnadawmna pek tur chu financial year 2026-27 annual action plan-ah telhin thla hmasa khan central-ah an thawn thlak tawh thu a sawi bawk.



VAIRENGTE

Vairengte Block MHIP ten report an dawn bawhzuiin Vairengte Police te nen tang kawpin gutkha product chi khat- Shikhar tam tham tak rawn phurh luh chu Vairengte Police CheckGate ah lo tiding in an lo man a. Shikhar hi avaiin Box 210 niin box khat hi cheng 300 man zel a chhut a ni a, avaiia halral zat hi cheng 63000 man hu vela chhut ani.

Shikhar hal ralna hmun hi Hope Centre Vairengte IOC ah niin halral tur hian he hmun din nana tha leh zung tam tak lo seng tawh tu MHIP Ex-General Secretary Pi Lalbiakengi chu sawm niin ani hian a halral na hun a rawng hmang ani. He hunah hian Vairengte Joint YMA hruaitu te leh Joint VC hruaitu te pawn an rawn tawiawm ani .



UPSC

Union Public Service Commission (UPSC) chuan vawiin khan Civil Service Examination 2025 result a ti chhuak a. A pumpuiah Rajasthan mi, kum 26-a upa Anuj Agnihotri chu pakhatna a ni a. Amah hi All India Institute of Medical Science (AIIMS) Jodhpur atanga MBBS zir chhuak a ni. UPSC chuan CSE atan hian nikum August thla khan written exam a buatsaih a, kumin February thla khan interview neih leh a ni a. Tun tum exam ah hian mi 958 an tling a. Indian Administrative Service (IAS), Indian Foreign Service (IFS), Indian Police Service (IPS) leh Central sawrkar Group A leh B hna hrang hrang pek an ni dawn a ni. Tun tum UPSC CSE 2025 ah hian hmarchhak state atangin mi 10 an inziak tling a. Manipur atangin mi 6, Assam atangin mi 3 leh Sikkim atangin mi 1 an tling a. Manipur atanga tling zingah hian zo hnathlak Calvin Ginminlein Zou (Rank 134) leh Liangousang Vualnam (rank 868) te an tel a.

